



Oktasaš ruossa

Ruossa lea juohkehaččas, daddjojuvvo. Dávjá ruossamet leat hui persovnnalaččat. Juoba olmmoš min lahka, ii álo árvit, makkár noađi nubbi olmmoš eallimisttis gurbu. Geasa nu mis vuostegiedageavvamat šaddet nu stuorisin, ahte son dovdá iežas báhcit áibbas okto iežas ruossas deattu vuollái.

Dán giđa oppa máilbmi gurbu oktasaš ruossa, koronavirusepidemijja suollemas gávvilis áitaga. Velá moadde mánotbaji dassái ođđasat Kiinnás orro leamen guhkkin. Dál spiehkastadiliid ja ráddjehusaid mielde árga lea nuppástuvvan miehtá máilmmi. Ná lea geavvan maid dábálaččat nu dorvvolaš Suomas. Mii leat gártan miedihit, ahte eat leat oppa iežamet bárpmusteametge dorvvus dán oppa máilmmi moiven virusa ovddas.

*

Áigeguovdilis oktasaš koronavirusa ruossa gurppodettiinemet lea min dehalaš muitit, ahte ruossa lea maid beassáziid biibbalmuitalusaid váibmosis. Evangelium muitala, mo Jesus gurppui ieš ruossas, man ala son loahpas bajiduvvui Golgata -nammasaš čoma alde.

"Dat lea dahkkon duohtan", ledje Jesusa mañimuš sánit ruossa alde. Dan mañnjá son állii oaivvis ja attii heakkas soabahemiin ná suttuideamet. Ruossa alde Jesus ollašuhitii iežas eallima áigge cealkán sániidis: "Stuorat ráhkisvuoda ii giige sáhte čájehit, go dan ahte addá heakkas ustibiiddis beales". Ruossas bođii loahpas ráhkisvuoda ja doaivvu mearka.

Ruossa ii goit šaddan beassáziid evangeliummuitalusa mañimuš oassin. Beassážiit hávddi lusa mannan nissonat bohte ruovttoluotta illuságain: Jesus eallá! Guoros hávddis čuovgi šerres čuovga vuoitá ruossa ja jápmima doaivvuhisvuoda.

*

Seammás go koronavirusa áitta lea bissehan min árgabeaieallima, almmuha birramet luondu, mii lea dálvvi čárvváid siste eret beassamin, juoidá áibbas eará. Davvi jogat ja jávrrit besset luomusin jienjain. Dutkkonat muoraide ihtet dänge giđa. Ođđa eallin luonddus bohciida ja ihtá oidnosii.

Giđđa luonddu sinfonijja čuodjá seamma áigge kristtalaš doaivvu ságain. Dán doaivvu sága addin vuimmiiguin doarjut nubbi nuppiideamet dáid hástaleaddji mánotbajiid áigge. Roahkasmahtes min dát lpmila sátni Jeremia girjjis: "Mun addán didjiide boahhteáiggi ja doaivvu".

Ovdalas Beassáziid 2020,

Jukka Keskitalo

Oulu bismagotti bisma